

Athör ë rou cì Joon gõt

Wet nom

Athör ë rou ëcì Joon gõt tènë akut kòc cì gam tedet. Wäär get yen athöör, Joon ë rot còl raandit, ku còl akut kòc cì gam aye tik ke miethke. Athör ciek kënë ë jam nhiër kam kòc cì gam, ku bì kòc yöök bik röt tiit tènë kòc aa lueth ku piööcden.

Käk tö thín

Muõth tueñ 1-3

Yic ku nhiër 4-6

Lëk rin piöoc ë lueth 7-11

Muõth ciëen 12-13

1 ¹ Ee yen raandit akut kòc cì gam, yen aget athör kënë tènë akut kòc cì gam cì Nhialic loc bì rëer keyiic ke cìt miethke. Wek aa nhiaar piändie ëbën, ku acie yen rot yen nhiaar we, aa kòc ëbën ñic yic cì Nhialic nyuõth ke, kek aa nhiaar we piänden yic aya. ² Wek anhiaar ke rin yook ëbën, yok aa ñic yic cì Nhialic nyuõth. Ku yic kucku abuk aa ñic akölaköl.

³ Bì Nhialic kek Wënde Jethu Kritho yo döc ku pelkë káraackua piny, ku bik yo còl areer ë duk döörden yic, te rëer yok dhël yic cik nyuõth yo, ke yo nhiaar röt kamkua.

Yic ku nhier

⁴ Yen a ya cì puõu miet apeidit wäär pin yen ye, lon kòc kök weyiic aake lui tecit te cì Nhialic ye nyuõth yo, yen ë kë cì lek yo buk ya looi. ⁵ Këya, wek kòc cì gam alek we lon yok aa dhil röt nhiaar ë kamkua. Ku kënë acie lõñ yam, ee lõñ theer ñicku tewäär buõth yok Jethu. ⁶ Na nhiarku röt ayic, ke yok aa dhil kë cì Nhialic lek yo buk looi, looi, rin wäär tueñ gem yok wet Jethu, kënë cì lek yo buk aa looi ë lon buk röt aa nhiaar kamkua.

Lëk rin piöoc ë lueth

⁷ Yen aluel kënë rin kòc kök ë kòc wëñ nyin aatö thín, aa kòc piöoc lueth ë path. Ayekë lueel lon Jethu Kritho akëc ben pinynhom kecìt raan. Raan ye lueel këlä, ee kòc wëñ wei, ku athõñ kek raan ater ë Jethu.

⁸ Tiëerkë nhim bì kockä we cii wëñ, bì kakkun puõth cäk looi tènë Nhialic cii mär ë path. Tietkë wenhiim apeì bì Nhialic we gäm ariöpdun ëbën.

⁹ Alek we, na ye raan juek këde thín kawäär cì Jethu piöoc yiic, ka cii kõñ mat kek Nhialic. Ku na cii raan wet cì Jethu piöoc juak ë welke ë rot, ka bì mat kek Jethu ku Nhialic Wun. ¹⁰ Ku na bö raan tènë we ku ye ke piöoc käk cii thõñ kek käk cì Jethu piöoc, ke duökkë còl abö pandun bì ben rëer kek we. Ayi muõth aya duökkë muõth. ¹¹ Kënë alek we, na ye raan muõth raan kënë bì ciet raan cì gam, ka cì rot mät ye. Ku aloi këreec ye looi aya.

Muõth ciëen

¹² Kājuëc apeì aake ba lek we, ku acä wic ba ke gõt athör yic ëmën. Kë wiëc ba looi, ku anääth aya, ee lon bì yen la keny tènë we, buk la röm ku jieemku röt ë kamkua, ku yok aabi puõth jal la yum yodhie.

¹³ Akut kòc cì gam ë tènë ë we muõth.